

CUSSEGL GROND

Sessiun da favrer 2023

Dumonda Preisig concernent collecziun da plastic e reducziun dal consum da plastic

Il rapport publicità dacurt da l'organisaziun nungovernamentala Oceancare davart il tractament da plastic ha revelà che la Svizra è a la testa da la rangaziun en il consum da plastic. Differentas medias han communitgà en chaussa, tranter auter er il Tages-Anzeiger en sia ediziun dals 9 da schaner 2023: «Differentis studis mussan che la Svizra tutga puncto materias sinteticas tar ils pli gronds producents da rument da l'entir mund. Cun annualmain ca. 109 kg per persuna ranghescha la Svizra en l'Europa suenter Luxemburg sin piazza 2, ... Il consum da plastic vegn a sa triplar senza mesiras effectivas, hai num en il pli nov rapport da la OECD da l'onn passà.»

Posts per rimnar PET datti dapertut e ston vegnir purschids da tut ils posts da vendita che vendan victualias u bavrondas en emballadis da PET. Bliers emballadis, sche betg ils bliers, tutgan dentant ad in'otra categoria da plastic (spezialmain materials sintetics da PE u da PP). La restituziun da quests tips da plastic è dentant bainquant pli cumplitgada ed en tscherts lieus n'è ella insumma betg pussaivla. Er qua stuess valair: Tgi che venda plastic, al sto er prender enavos. Almain stuess dapertut là, nua che satgs da rument pon vegnir cumprads, er vegnir purschids satgs per rimnar plastic. Ina dumonda Deplazes correspondent da l'onn 2017 han la Regenza sco er il Cussegl grond refusà. Las cifras qua survart pretendan dentant d'agir. La UE scumonda dapi l'onn 2021 pusada e vaschella a diever unic u bavrolas e truschets da plastic ad occurrenzas grondas.

Anc pli impurtant fiss dentant – ultra da simplifitgar la collecziun da plastic – da megliar il material d'emballadi e da renunziar cumpletmain da plastic a diever unic.

Jau supplitgesch perquai la Regenza da responder las suandantas dumondas:

1. Tge instruments vesa la Regenza per simplifitgar resp. per augmentar la collecziun da plastic?
2. Vegn la Regenza a realisar quests instruments? Cura?
3. Prenda la Regenza activamain mesiras per evitar ruments da plastic, co quai che fa per exempel la UE?
4. Co vul la Regenza per exempel reducir il consum da plastic per persuna en il chantun, per exempel tras utilisaziun multipla u tras incassament d'ina taxa da deposit?

Cuira, ils 15 da favrer 2023

Preisig, Mazzetta, Bachmann, Atanes, Bardill, Baselgia, Biert, Bischof, Bisculm Jörg, Bleuler-Jenny, Bundi, Cahenzli-Philipp (Vaz Sut), Degiacomi, Dietrich, Furger, Gartmann-Albin, Gredig, Hoch, Hofmann, Kreiliger, Müller, Nicolay, Oesch, Pajic, Rageth, Rettich, Rusch Nigg, Rutishauser, Walser, Zaugg-Ettlin